



# SHEUE INNU



# E NATAPUSHTATINANUT



UTIPATSHIMUN MASHINAIKANUIAN

Pishimuss 2007

**MASHTEN NANA KA  
UNUIPANITAKANIT  
SHEUE INNU**

Tshetshi petakutakanit aimun! Mishta-apatenitam<sup>u</sup> CTMN.

Ute tshi tatu-minashtakaniti, Conseil tribal Mamuitun mak Nutakuan (CTMN) tshika tshissenitamunieu innua anite Essipit, Mashteuiatsh mak Nutakuan eshi-unuipanit aimun anite e natapishtatinanut e apatenimati eshi-inniuiht Premières Nations.

Nenu anutshish tshe ussi-aitik, CTMN itenitam<sup>u</sup> anu anema auennua tshi katshituat kie anu minuat, tshi minu-petamek<sup>u</sup> eshi-unuipanit aimun anite e natapishtatinanut kie nenua Tshishe-Utshimauat utapuetatishunuau tshitshi anu minu-nishtutamek<sup>u</sup>. Anu uet apatat aimun tshika uauitamakunau kassinu auen tshi nishtutak, eukuannu ua ishi-katshitukueik<sup>u</sup> CTMN e neshuepanitat aimunnu.

Nanikan e mitunenitakanit tshe takuak Tshitshe Utshimauat utapuetatishunuau neumenu

Ui natshi-uapamiat anite :

[www.mamuitun.com](http://www.mamuitun.com)

Premières Nations natshishkuati utinnima, CTMN pakushenitamueu innua tshitshi patshiti-naminiti utaimunnu e minu-nishtutatishuniti. Eukuannu uet itenitamupan tshitshi ait ishi-petakutat aimunnu miam e uapatakanit mak e petakutakanit. Uesh anitshenat Premières Nations apu ut mashinaikanashteniti ueshkat utaimunuau muk<sup>u</sup> aiminanuipan eukuannu tshe ut ishi-petakuat anutshish aimunnu.

Eka e uitakanit tan miam tshe aitinanut, ume anutshish, CTMN tshi uitam<sup>u</sup> ma uin tshe ueuetinak nenu Sheue Innu, ussi-atusseuakana tshika unuipanitau e apatannit kie tshe natuapatak eshi-uenutishiuimakannit anite Mashteuiatsh, Nutakuan mak Essipit anite tshe ui tshishtapanitakanit Tshishe Ushimauat utapuetatishunuau miam eshi-shutshenitahk Premières Nations.

Minu-nakatuenitamuk<sup>u</sup>... ute tshi tatu-minash-takana tshika tshissenitaminikunau!



## E uauitakanit eshi-tipenitakanit Innu Aitun anite e natapishtatinanut

### Tshitshipanu e atusseshtakanit anite Nikan mitshishuakanit e natapishtatinanut

#### Innu-Aitun, tapishkut eshi-uapatakanit

Nana ka natapishtatiht 13 e tshishtuakanit uapikun-pishim<sup>u</sup> 2007 anite Musée amérindien Mashteuiatsh, Conseil tribal Mamuitun mak Nutakuan, Mashteuiatsh, Nutakuan mak Essipit manikut tshi natapiht nenua e nishtunit nenua Premières Nations uauitamuahat nikan e natapinit tshishe-utshimau Uepishtikueiat mak Ataua mak kutaka kupaniesha anite tshishe-utshimat, eshi-uapatakanit Innu-Aitun. Natashtapanat tshi tshitshipanuatsheenanut tshe aimuatakanit ne mashinaikan eshinakatet « Innu-Aitun, tapishkut eshi-uapatakanit » tshitshi aieshkuinanut tshe natashtakanit ne mashinakanit EdPOG eshinikatet anite 5 etashtet e tipanakanit uesh eukuan eshi-nishtuapamitishuiak.

Ka patshitinak aimunnu, ne Clifford Moar anite CTMN ka uauitshiuat e atusseshtak, kassinu minuenitamikupanat ka natapiht iaissishueniti kie ekue tshi kukuetshtishemuht ua ishi-natu-tshissenitahk, anu ekue nishtutatishinanut tan eshi-ishpitenitak Innu ne Innu-Aitun e uauitakanit, eshk<sup>u</sup> ume anutshish kashikat.

Anite tshika mishkenau 3 mak 4 etashtet e passetshinikanit aiapishish e mashinaikanashtet ka ishi-patshitinikanit aimun ka tutak CTMN nenu « Innu-Aitun, tapishkut eshi-uapatakanit ». Anu tshika tshissenitenau tshe ishi-ashpitashimua-tshet CTMN natapit tshe uauitak tshe ishi-tipenitakanit Innu Aitun e katshitaikanit.



#### Innu Aitun, tshe natashtakanit tshe ishi-uauitakanit

Nana 27 e tshishtuakanit uapikun-pishim<sup>u</sup> 2007, Innu nikan e tat ka tshimanakanit e natapit mak anitshenat Uepishtikueiau mak Ataua tshishe-utshimauat tshimanepanat auennua tshe atusseshtaminiti tshitshi aieshkushtaniti tshe ishi-natashtakannit aimunnu anite nikan mitshishuakanit e natapishtatinanut e katshitaikanit kassinu aitinanut e Innu Aitinanut. CTMN kie uin minepanat ukupaniema tshi atusseshtaminiti kie shash anite ui tshitshipanu e uauitak anite nikan mitshishuakanit e natapishtatinanut umenua tshishe-pishim<sup>u</sup> 2008.

Miam etashtet anite nishunnu ashu patetat (25) e passetshinikanit anite EdPOG eshinikatet, nenua tshishe-utshimauat utapuetatishunuu, ume ui utitaikanu e uauitakanit ua pimipanitakanit Innu Aitun.

- tshitshi uemut nishtuapatakanit kie tshitshi shaputuepanit;
- tshitshi minupanitakanit e aitunanut minekash tshi nukuak;
- tshitshi minupanitakanit e pimipanitakanit Innu Aitun mak e utinakanit eshi-takuak atamit assit;
- tshitshi shaputue akua tutuakaniht aueshishat kie anite e taht kie kassinu iashi-takuak minashkuat;
- tshitshi nakatuenitakanit e minuinnunanut kie akua tshi tutuakanit auen anite e Innu Aitinanut;
- tshitshi akua tutakanit eshpish nipatshenanut anite nutshimiu-assi shaputue tshi nataunanut mak tshe matinamatinanut eshi-tat aueshish ashit kutak ka taht anite Nitassinan, miam ka ishi-nishtutatitanut tshi ishi-pimutenanut;
- tshitshi nishtuapatakannit mak tshi kuetshi-makaniht eshi-tshissenitaht kie eshi-pikutaht Innuat kie peikuan anite ka mishta-nishtuapatakanit minashkuau ka atusseshtakanit;

Mitshetuait tshika ishi-uauitakanu natapishtatinanut miam pate ushat innuat tshe kanuenitaht utakuaikan-mashinaikanuau mak tshekuannu tshe tipaitsheuatshieht anite e pimipanitakanit Innu Aitun anite Nitassinan mak tshitshi takuannit tshe ishi-pimutet e minupanitat utakuaikan-mashinaikan ashit nenua kutaka tshishe-utshimaua.

## INNU AITUN, TAPISHKUT ESHI-UAPATAKANIT

Uitakanu anite tipatshimun eka nita uet patshiti-namat, ataueiat, kie apu ut mishkutunamat nitassinan. Apu nita ut shakuikuiat. Eshi-inniuiat nitishi-tshishkutamakutan tshishi ishpitenimat tshekuan ka inniuimakak kie eukuan niashamat, pet aianishkat niminu-utinatanat ka ussi-takushiniht kie nimatinamuatan eshi-tshissenimat. Kashikat eshk<sup>u</sup> ute nitatanan nitassinat kie eshk<sup>u</sup> nitapuetatishunan tshitshi matinueiat nitassinan.

Apu tapishkut ishi-tapishiniat anite nitassinan miam anitshenat ka ussi-takushniht. Ute tatu-tshishe-mitashumitanuepipuna, ne eshi-tapishiniat eukuan uet tshi nishtuapamatishuiat, nitinnu-aitunan, eshi-uapatamat inniun kie eshi-nitautshitishuiat, anite eshi-ishpitenimat mak eshi-mamtunenimikuiat tshekuan mishta-ait nitishi-uapatenan mak anitshenat ka ussi-takushiniht.

Nishtunakuan eka tapishkut eshi-inniuiat, kie nukuan anite pet aianishkat ka ishi-pimipanitaiat Innu Aitun, ne ninan eshi-nishtutashiat e pimipanitaiat Innu Aitun. Ne mashinaikan tshe ui nishtutatinanut minu-uaitakanu anite peikuu kassinu e tipanikanit muk<sup>u</sup> ne e katshitakikanit « Innu Aitun ». Innu Aitun eukuan tshitshue anite ut nishtuapamatishuiat eshi-inniuiat. Eshi-uapatamat Innu Aitun tshikanakuan ne ishpitenimat kie eshi-tapuetatishuiat pet nitipatshimunan, aianishkat nikanishinanat kie nimushuminanat. Ne eshi-tapuetatishuiat nishutshenitenan tshe uishamitshiht Innuat, anu mak anitshenat ka auassiuht, anu uet ishpitenimitshiht, tshitshi kutshipanitishuht tshe ishi-atusseht anutshish kie aishkat. Eukuan ne ua uitamatat eshi-uapatamat ninan ueshkat mak aishkat Innu Aitun. Ninan eshi-uapatamat Innu Aitun mashinateu anite EdPOG eshnikatet eukuan ume etashtet :

### Innu Aitun

**Innu Aitun eukuan ne kassinu e aitinanut, ueshkat kie anutshish, peikuan anite eshi-inniunanut, eshi-ishpitenitakanit mak shashish ka ishi-inniunanut anite e tapishinanut ka tananut nutshimiu-assit mak aiti-**

**nanut anite Nitassinan kie eshi-tapishinanut anite assit. Eukuan e katshitaikanit e nataunanut, e kussenanut, e tishunakananut kie e natamishinanut, eshi-tapuetatishut innu mak eshi-nitautshishunanut.**

**Kassinu katshitaikanu anite eshi-tapuetatishunanut, eshi-innu-aitinanut, eshi-aitunanut mamu e tananut. Anite uin e atue-nanut tshekuan Uepishtikueiau tshishe-utshimau mak Ataua apatannu utakuaikamashinaikan.**

**Innu Aitun eukuan ume eshi-katshitaimakak eshi-utinakanit assit : aueshish, ka nipishut mishtik<sup>u</sup>, ashini, nipi kie kutak eshi-takuak assit tshe apatat e mitshishunanut, anite eshi-tapuetatishunanut kie anite e nitautshitishunanut, anite tshe ut pakassitishunanut miam etashtet anite 5.2.4.**

Eshi-tapishiniat ashit Nitassinan apu itenitakuak miam eshi-uapatak tshishe-mishtikushu. Apu tipenitak assinu ishi-uapatamu innu. E tipenitakanit tshekuan itenitakuan miam peikuan e kanuapitshet auen kie ma miam tshishe-utshimau uin eshi-tipenitak.



Pessenitakanit assi kassinu innu katshituku, eukuan eshi-tipan uapatamatishtut innu kie e ashineuatshet eshi-inniuti. Ekute e tapishik innu kie ekute e itashimut kie ekute miamitunenitak tshe aitik kie tshe ueuetinak tan tshe aitik.

Eshi-tapishik anite assit mamu ka tipenitakanit, tshishpeuatakanu kie ekute e tapishinanut. Assi eukuan an anite uet tshi nishtuapamitishunanut, e nakatuenitakanit assi kie tshe ui aishkat pimi-panituatishunanut. Nitshi-inniunan uin anutshish miam eshi-inniunanut kashikat, muk<sup>u</sup> nimishta-apatenitenan eshi-ishpitenitamat. Eukuan nani-tam nitishi-inniutan anite nutshimit uesh eukuan nikauinankassi ka ishi-patshitinak tshi pakasitihuiat. Ninan au ka nakatuenitaht assinu mak anite iashi-takuak assit. Anu ma Innu Aitun e uauitakanit, shaputue nui kanuenitenan ninan eshi-inniuiat, anu iapatat mamu e tipenitakanit tshekuan ma kat e peikussit auen tshi tipenitak. Eukuannu uet anitshenat Premières Nations nakatuenitaht assinu kie tshitshi kaukau nitau-tshimakak tshekuan tshe apashtaht nishteshinanat, nimishinanat kie aianishkat nitauassiminanat.

Innu Tshishe Utshimau kanueniteamu tshe ishi-pimipanitat takuaikan-mashinaikannu mak e utinak aimunnu tan tshe aitinanut ashit Innu Aitun, ekue katshitaimakak, tshe ishi-takuaimatakanit Innu Aitun anite Nitassinan. Innu Tshishe Utshimau tshe aitutak nenu Innu Aitunnu tshika shaputuepannu, miam pet ka ishi-ishpitenitakanit e innu-aitinanut kie tshika natu-tshissenimakaniht ka uikanishat anitshenat ka taht anite Premières Nations.

Kashikat eshi-pimutenanut innuat e itutetau anite Nitassinan miam ueshkat ka aitinanut aituat kie peikutau ishi-utinamuat assinu. Tshetshi uemut shaputuepannit ka ishi-inniuiat kie muk<sup>u</sup> anu tshitshi minu-tapishiniat ashit Nitassinan, tshika takuan tshe ishi-pimutenanut tshitshi nukutaiat e Innu-Aitiat.

*Anite ut utikanu ume etashtet : E Innu Aitinanut, tapishkut eshi-uapatakanit, CTMN, 12 uapikun-pishim<sup>u</sup> 2007*



## **Ka natshishkuat Sheue Innu Ka aiminit Carl Nepton nikan e tanit e natapishtatinanut anite Conseil Tribal Mamuitun mak Nutakuan**

**Shaputue ute, tshika uapatenau Ka aimit Nepton ka ishi-patshitinak aimunnu mashten nana ka unuipanit Sheue Innu.**

### **Sheue Innu :**

Utshimau Nepton, tshipa tshi uitamunan tshekuannu CTMN uet punit e unuipanitat Sheue Innu mak tshekuannu tshe ut anutshish unuipanitat tipatshimu-mashinaikanuianu umenu 2008 pipunnu?

### **Carl Nepton :**

Shash ume nishtunnuepipuna eshpish natapishtatinanut. Ushkat uenuipanitakanit Sheue Innu 1998 itashtepan pipun, shash peikushteutatupipuna, tshitshi uauitakamuakaniht eshpannit anite e natapishtatinanut anitshenat innuat Premières Nations eshi-uiniakaniht eukuan ut unuipanitakanipan. E natapishtatinanut e uauitakanit eukuan ut takuanupan Sheue Innu. Eshpish tshi unuipanit Sheue Innu, CTMN tshissenimuepan innua utaimunnuka taniti anite Premières Nations, natapishtatinanuipan tshi uauitakanit « Tapishkut ua utitakanit » nuash anite e papannut e natapishtatinanut Mashinaikanit ka nishtutatinanut ka mashinatu-taishinanut uinashku-pishim<sup>u</sup> 2004. Anite Mashinaikanit ka nishtutatinanut, uitakanu anite tshekuannu ua apashtaht innuat (tshe ishi-pimutenanut assit, e Innu aitinanut, utapunuu tshe takuannit e takuaimatakanit assi, eshi-takuak tshekuan assit mak anite uashka e tananut, e ui tipenimitishunanut, tshe ishi-pimutenanut e anuemakanit auen, shuniatat, tshe mishituepanitakanit atusseun tshi takuak...) eukuan neni e nikanashtakaniti e uauitakaniti e natapishtatinanut nuash e mashinaikanashtakanit tshishe-utshimauat utapuetatishunuau. Shash peshinakuan tshe tshishtapanit tshishe-utshimauat utapuetatishunuau, innuat tshika patshitinamauat utaimunuau ne ua aitinanut, eukuannu tshe ut unuipanitat CTMN tipatshimu-mashinaikanuianu tshe uauitak nenu, namaieu ma anutshish tshe uauitakanit e natapishtatinanut.

### **Sheue Innu :**

Tshekuan tshe ut apashtaiaku tshishe-utshimauat utapuetatishunuau?



### **Carl Nepton :**

Tshishe-utshimauat utapuetatishunuau tshika tshishpeuatam<sup>u</sup> tshitipenitamunua mak eshi-innuiak<sup>u</sup> e nashakanit ute anutshish aitinanut assi mamu e taiak<sup>u</sup>. Apu eshk<sup>u</sup> minu-tshissenitakuak anite ka ueueshtakanit eshpanitunanut ashit kassinu mamu eshi-taht innuat ute assit. Anitshenat Premières Nations tshe mashinatu-taishuht tshishe-utshimauat utapuetatishunuau muk<sup>u</sup> anu aiat minu-apuat mak at anitshenat eshk<sup>u</sup> ka minu-nashahk nenu Takuaikan-mashinaikannu innuat ka takaukaht, e tipuenitakanit anitshenat Cris Baie-James ka taht eshpanniti uinuau mak at nenua kutakat innua ute Uepishtikueiau assit ka taniti. Takuak tshishe-utshimauat utapuetatishunuau uetshit innuat tshika tshi tshitapamatishuat, tshe utinitishuht uinuau anite mamu kie tshe tshishpeuatutishuht tipan anite uinuau eshi-inniht.

### **Sheue Innu :**

Innuat Mashteuiaht, Nutakuan mak Essipit naushunamupan uinuau tshitshi natapiht tshitshi



nishtuapamakaniht, tshipa tshi a uiten tshekuanu nenu ka ut ishi-naushunahk mak tan minuat etshi-ishi-pimutenanut tshi nishtuapamukushinanut?

**Carl Nepton :**

Ninan, Premières nations anite Mamuitun mak Nutakuan, mitshetuait nikanuenitetan kie taship nikanuenitetan tan tshe ishi-nishtuapamukuiat : e peikuteshnanut eshi-uapatakanit, ka ueueshtakanit e itutenanut kie ma e natapishtatinanut. Anite ka ueueshtakanit peikuan an tshika itutakanu e ui tshishtapatakanit e natapishtatinanut mak at tshi peikuteshiat eshi-uapatamat tshipa katshitueu kie anite eshi-minupanitunanut anite mamu e ui tananut ashit anitshenat eka ka innutau. Anutshish uin nitenitenan e natapishtatinanut eukuan anu uet minupaniuet e ui minupanitunanut mamu e tananut. Apu uin takuashit ne meshkanau uetinkanit anite e uauitakanit mamu e tananut anu mak uinuau e mitshetiht etashiht mak tshinanu.



Anu uet apatannit CTMN ka tutak tshekuannu eukuannu tshitshi eka ashtueikaniti tshitipenitamunua ka natapinanut takuanupan anite Mashinaikanit ka nishtutatinanut. Eukuan enut tekuanit anite utipatshimunit e mashinatutaishinanut ute Canada assit, aianishkat tipenitamuna e uauitakaniti, kie peikuan innuat tshi ishi-nishtuapamukuiak<sup>u</sup>, tshika nishtuapatakanua, tshika tapuetatishunanu mak tshika tshishpeuateua. Ekute tshishe-ushimauat utapuetatishunuaua tshika tapueienitakuana anite ka ueueshtakanit tshitipenitamunua.

**Sheue Innu :**

Tshipa tshi uiten tshekuana e nikanashtakaniti e natapishtatinanut?

**Carl Nepton :**

CTMN nanitam nashamupan ieshi-nikanashtat e natapishtuati Uepishtikueiau mak Ataua tshishe-utshimaua. Nana tshishe-pishimu 2003, Innu-utshimauat uauitamupanat nana ka natapinanut anite Uepishtikueiat ka natashtakanit Mashinaikan ka nishtutatinanut, issishuepanat innu-utshimauat : tshetshi nishtuapatakanihk tshitipenitamunua kie eshi-inniuiaku, e tapishinanut ashit natau-assi (Nitassinan), mamu tshi minupanitunanut mak e tshi minu-uitsheutinanut ashit eka ka inniuhk mak e uitshi-atussemitanut eukuan e nikanashtakaniti e natapishtatinanut.

**Sheue Innu :**

Kassinu tshitshissenitenanu eshpish ishpitenitaht innuat unatau-assiuaua. Shaputue e tapishinanut ashit natau-assia nikanashtakanu anite e natapishtatinanut, tan tshe ishi-uauitakanit anite tshishe-utshimauat utapuetatishunuau?

**Carl Nepton :**

Nanitam tapanat innuat anite unatau-assiuat kie anutshish eshk<sup>u</sup> tauat anite, Nitassinan. Ume anutshish eshi-natashtakanit, mak at tshi ui katshitinakanit e mishat tipenitamun anite e apishashit assi , anutshish innuat kassinu tipenitamunnu ui katshitinamuat nutim eshpishanit anite Nitassinan muk<sup>u</sup> e tipuenitakanit aitapatiti tatipan assia. Miam pate mishue Nitassinan Innu-Aitun tshika takuan e nashakanit Takuaikan-mashinaikan mak eshi-pimutenanut kie ninatashtatan netuenitamat tshi kanuenitakanit tipenitamunan anite Innu Assi (assia ka



tipenitaht innuat), assia aianishkat ka tananut, innuat tshe ueuetinaht mak tshe ishi-mishituepanitaht atusseunnu, mak ka nakatuenitakaniti assia. E upimeshtakanit e natapishtatinanut assi ut, nuenutishiunan eukuan ne tipan kie ninan eshi-inniuiat. Anite tshishe-utshimauat utapuetatishunuau, tshika tshishpeuatakanua kie tshika nukutakanu eshi-innu-aitiat, eshi-aimiat, eshi-inniuiat mak tipan eshi-tshissinuatshikuiat.

### **Sheue Innu :**

Nenu tshishe-utshimauat utapuetatishunuau tshika takuannu tshi mashinatutaishitau innuat Premières Nations Mashteuiatsh, Essipit mak Nutakuan. Tan tshe ishi-pimutenanut mak tsheku-aimunnu tshe natashtuakaniht innuat tshitshi patshitinihk utaimunuau e natashtakannit tshishe-utshimauat utapuetatishunuau?

### **Carl Nepton :**

Eshk<sup>u</sup> mekuat e natapishtatinanut, ushkat tshekuannu tshe tutak CTMN mak nenua e nish-tunit Premières Nations ka taniti tshika nemishuepanitauat aimunnu aiashi-katshitaikaniti tshekuana anite tshishe-utshimauat utapuetatishunuau. Tshishe-pishim<sup>u</sup> 2007 tshika tshitshipanu e patshitinakanit aimun, kie muk<sup>u</sup> anu aiat tshika uauitakanu nuash e tshishtapanit e natapishtatinanut. Uemut uin patush nasht tshika tshishtapanu aimun tshishtapanit e natapishtatinanut uesh tshipa tshi mishkutshipanu aimun mekuat e natapishtatinanut. Muk<sup>u</sup> eshpish tshishtapanitaht ka natapishtatiht, shash tshe patshitinakanit aimun, mitshetu-tatu-pishim<sup>u</sup> tshika uauitakanu, tshitshi minu-uauitamuakaniti



innuat tan ka ishi-ueueshitishuht ka natapishtatiht nuash e minu-nishtutaht innuat Premières Nations anite Mashteuiatsh, Nutakuan mak Essipit. Tshissenitam<sup>u</sup> CTMN meshta-apatannit tshe ishi-patshitinak aimunnu tshi ui tapuetakanit ne tshishe-utshimauat utapuetatishunuau uesh ekute tshe ut tshissenitakuak tshi mashinatu-taishuht innuat..

### **Nakatuenitamuk<sup>u</sup> ute tshishe-pishim<sup>u</sup> 2008**

Umenu tshika uauitam<sup>u</sup> « Vers le traité, un horizon à notre portée » CTMN tshe tshitshipanit e patshitinak aimunnu. « PETAKUTEU » tshika ishinikateu e innu-aiminanut.

### **Sheue Innu :**

Ek<sup>u</sup> tanite piapannanut anutshish e natapishtatinanut?

### **Carl Nepton :**

Anutshish mekuat eukuan tshe ishi-pimutenanut anite natau-assit nuauitenan. Eukuan anu meshta-mishat kie meshta-apatat anite e uauitakanit tshe ishi-takuak anite tshishe-utshimauat utapuetatishunuau. Shash nika ui tshishtapanitanan e uauitam<sup>u</sup> ute pishimuss 2007, anutshish ume tshi tatu-minashtakana.

Ninishupanitan e uauitam<sup>u</sup> tshekuana kie neni assia tshe aitapatati aianishkat ka tananut, ka nakatuenitakaniht assia mak innuat tshe ueuetinaht mak tshe ishi-mishituepanitaht assia. Neni ushkat nishtu tshekuana e uauitakaniti shash mishta-nikanapanu uesh shash anite takukanupanat Mashinaikan ka nishtutatitananut, mauat uin ne innuat tshe ueuetinaht mak tshe ishi-mishituepanitaht assia. Shash uin anite papananu e uauitakanit tan tshe ishpannit utipenitamun tshishe-utshimass mak anite tshishe-utshimatat, mak innuat utapunuuau anite tshe ishi-pimutenanut mak tshe ishitakuaimatakanit kie peikuan tsheku-assia e katshitaikanihk.

## **Journal Sheue Innu**

Ka tshitapatak.....Raoul Kanapé  
Utshimau ka tipatshimuet.....Me Carl Nepton



Minuat nish<sup>u</sup> kutak tshekuan tshe uauitakaniti eukuan Innu Aitun mak tshe ishi-ne-mishuepatakanit tshekuan anite e atussenanut. Ne uin Innu Aitun shash tauat e atusseshtaht tshi uitahk tsheku-aimunnu tshe natashtakannit. Shash kie nitshi uauitenan tan eshi-uapatamat Innu Aitun anite e natapishtatiat kie shash tshissenitakuan tshekuan tshe katshitaikanit tshi uauitakanit mak tshi tshissenitakanit tshekuana tshe uauitakaniti pitau anite tshe ishi-nishtutatinanut.

Ne uin anite tshe ishi-pimutenanut e nemeshupanitakanit atusseun, shash anite Mashinaikanit ka nishtutatinanut minu-uauitakanipan muk<sup>u</sup> apishish tshika ashushtakanu tshekuan mak tshi uauitakanit tan tshe ishi-pimutenanut.

### **Sheue Innu :**

Anite Mashinaikanit ka nishtutatinanut, takuan anite e tipanakanit uauitakanit uenapissish tshe ishi-pimutenanut tshe ishpish natapishtatinanut. Uitamunan peik<sup>u</sup> tshekuan ka katshitinamek<sup>u</sup> e nashkanit eshi-pimutenanut uenapissish?

### **Carl Nepton :**

Anite 19 e tipanakanit ne mashinaikanit, mitshetuait anite tshekuan ui katshitaikanipan miam e tshishpeuatakaniti tshitipenitamunua mak eshitakaukiak<sup>u</sup> meshinateti anite Mashinaikanit ka nishtutatinanut ume antushish niatapishtatinanut

tshe takuak tshishe-utshimauat utapuetatishunuau. Mitshetuait shash tshekuan nikatshitinenan. Ninatapishtuatan Uepishtikueiau tshishe-utshimau, ume utat pipun, mitshetuait ishi-natu-tshissenitakanipan miam tshitshi natu-tshissenimat innua ua aitik tshekuannu mak tan tshe ishi-pimutet e natu-tshissenimat. Takuan anutshish mekuat eshi-pimutenanut e natu-tshissenitakanit anite natau-assit, kutak anite e tshimakaitshenanut eshakumipipuna (PAIF), ek<sup>u</sup> kutak tshe ishi-ueuetinakanit e tshimakaitshenanut (PGAF). Mekuat uauitakanua anutshish nanamissiu-ishkuteua mak ashinia, kie peikuan « gaz » mak pimi, katshi natapishtuakanit Uepishtikueiau tshishe-utshimau, tshika utinamutak nenu eshi-natash-tuakanit.

lapit ne e uauitakanit eshi-pimutenanut uenapissish, nui tshishpeuatenan kie Innu Assi, ka nakatuenitakaniti assia, aianishkat assia ka tananut eka tshitshi nanatupatshenanut kie utinakanit ashinia eshpish natapishtatinanut.

### **Sheue Innu :**

Utshimau Nepton tshimishta-nashkumitinan katshi tapuetam<sup>u</sup> tshi patshitinam<sup>u</sup> tshitaimun.

### **Carl Nepton :**

Tshinashkumitin.



Ume pieshinakuak tshishe-minashtakan, kupanieshat anite Conseil tribal Mamuitun mak Nutakuan tshimishta-atamishkakuuat.

Tshima ussi-pipun 2008 minupanikuiak<sup>u</sup> ua tutamak<sup>u</sup> e mishati tshekuana, anu ma tshetshi tshishtapanitakanit tshishe-utshimauat utapuetatishunuau uinuau ut anitshenat Premières Nations innuat anite Mashteuiatsh, Nutakuan mak Essipit.

### **Tshima minu-tshishe-minashtakanelek<sup>u</sup>?**

Me Carl Nepton, négociateur en chef